



Održano ročište u predmetu „Bilal Bosnić i ostali“

U Siriji ratuje 150 ljudi iz BiH, 30 ih već poginulo

Uhapšeni su se u Siriji borili na strani IS-a, tvrde iz Tužilaštva

U Sudu BiH jučer je održano ročište po prijedlogu Tužilaštva BiH da uhapšenima u akciji SIPA-e „Damask“ Bilalu Bosniću, Avdulahu Hasanoviću, Enesu Mešiću, Eminu Hodžiću i Ademu Karamuji bude određen pritvor za još dva mjeseca. Oni se sumnjiče za krivično djelo terorizma, javnog poticanja i vrbovanja za terorističke aktivnosti.

Tužilaštvo je navelo da je

razlog prijedloga za produženje pritvora činjenica da nisu mogli završiti istragu. Postupajući tužilac Dubravko Čampara rekao je jučer da Tužilaštvo još nije uspjelo saslušati sve svjedoke, a planirano je saslušanje ukupno 30 osoba. On je ustvrdio da još nije završeno ni vještačenje oduzete opreme, mobitela i kompjutera.

- Imamo dokaze da su uhapšeni, osim Bosnića, bili u

Siriji i da su se borili na strani IS-a i „El-Nusre“ i da su bili pod direktnom komandom Bagdadija - rekao je Čampara.

On je kazao da je jedan od razloga zahtjeva za produženje pritvora i mogućnost bijega pritvorenih, kao i da bi mogli utjecati na svjedoke. Istakao je da bi svi mogli ponovo otići u Siriju na ratište, čime bi bili nedostupni bh. pravosuđu. Dodao je da je nakon odlaska Nusreta Imamovića iz BiH,

upravo Bosnić preuzeo njegovu ulogu.

Tužilaštvo je navelo da, prema njihovim informacijama, čak 150 građana iz BiH ratuje u Siriji, a da ih je već 30 poginulo. Odbrana je negirala sve navode Tužilaštva kazavši da su oni neargumentirani i paušalni, zatraživši da uhapšenima budu određene mjere zabrane. Sud BiH sutra će odlučiti hoće li prihvatiti prijedlog Tužilaštva. *M. Aš.*



Bosnić: Vrbovao mladiće